

## Çend helbest ji nişteciyên xewnan re

**Husên M. Hebeş**



**Husên M. Hebeş**

### **Ehmedê Xanî**

Min Mem û Zîna xwe nivîsand

Tenê ko ji we re bibêjim:

- 1- Hayê we ji bekoyan hebe.
- 2- Ramanên kewan ji mejiyê xwe bavêjin.
- 3- Bila evîn di nav we de  
Dara herî bilind be.

Ez

Ehmedê

Xanî

Me

Çima hûn guhdarî min nakin?!

### **Federico Garcia Lorca**

“Ez li kujerê Lorca digirim,,

**H. Bedirxan**

Zengilên xaçexanan lêdîketin  
Çejnên rengîn ji perrên çivîkan diweşîyan  
Berfeke nazik, nerm... nerm dibarî  
Di nav rihê berfê de.  
Kenekî  
Spî,  
Spî..  
Wek xewneke tenik vedibû.

**Lorca** serê xwe ji çemên peyvî derdixist  
Û li ser valahiya asoyan  
Helbesteke wek "stranên qereçîyan" dinivîsand  
Û di guhên ezman de sê caran digot:  
"Ko ez mirim bihêlin balkona min vekirî bimîne....,,

Lê her tişt wek hunereke vala bû,  
Leylan bû,  
Sîber û sîtav û hilweşandin bû,  
Herifandin û qelişandin bû...  
Ne zengilên xaçexanan lêdîketin  
Ne jî çejnên rengîn ji perrên çivîkan diweşîyan.  
Ne berf û ne jî kenê spî dibarî...  
Ne.. tiştêk  
Ne.. tiştêk!

Di şeveke tarî de  
Bê heyv  
Ne çire û ne jî çirûsk  
Laşê **Lorca** par û talan kirin.

Cîhan paşkûnkî diçû,  
Bervaca dikeniya  
Rengên goristanan seriyên xwe hildidan.  
Di wê şevê de  
Giyânên kevokan li ser sîvlekên malên Spanîyan dixeniqîn...  
Di wê şevê de  
Heyv û stêrk kelûgirî bûbûn, matmayî mabûn...  
Di wê şevê de  
Şev nîfirek mezin bû.

Lê rodanka helbesta **Lorca** hîn û hîn  
Evîndê dide Dilên evîndaran  
Evîndarên wek:  
Ba,  
Berbang,  
Buhar,  
û baranê..  
Evîndarên wek:  
Pelên zeytûnan  
Û

“Stranên qereçiyar „ yên ji dûr û kûraniya  
Dilan ve diherikin.

## Yanîs Rîtsos

Her ko helbestek dinivîsand  
Bêriya nivîsandina yeke din dikir  
Ji ber wê jî  
Ew ji zîndanekê dibirin zîdaneke din  
Û ji bajarekî surgûnê bajarekî din dikirin.  
Ji ber wê jî  
Xewnên wî ji cihekî difiriyar cihekî din  
Û helbestên wî dibûn  
Av, agir û ba...  
Aso himbêz dikirin  
Stêrk nêzîkî hevdû dikirin  
Û azadî, avîn, jîn...  
Di dilan de bihêz dikir  
Ji ber wê jî  
Ew evîndarekî bê dawî bû  
Ji ber wê jî  
Em helbestên wî bi hanasên  
Dilên xwe dixwînin.  
Û di mejiyên xwe de dimeyînin...

## Fernando Pessoa

Tîp mistdidan  
Peyv jê difirîn  
Peyv mistdidan  
Hevok jê difirîn  
Hevok mistdidan  
Helbest jê difirîn  
Helbest mistdidan  
Pirtûka jiyanê  
Tijî evîn dibû.

## Aimé Césaire

Birako...  
Em jî weke we ne  
Ji şahiyê tenê şînê dizanin  
Ji aramiyê tenê girî dizanin  
Û ji evînê tenê keseran dikşînin.

Birako...  
Em jî weke we ne

Hûn reşik in  
Lê dilê we spiye weke berfê  
Em spî ne  
Lê bextê me reşe weke komirê

Birako...  
Ji serdanan  
Em tenê serdana goristanan dizanin  
Ji çûndinan  
Tenê çûndina ser miriyan dizanin  
Ji seyranê  
Tenê seyranê li ser çiyayê dizanin!  
Û ji “gerê tenê  
Mişaxtê û ji cih hilbûnê dizanin,,

Bireko...  
Em bi hemû tiştan weke hev in  
Weke hev in  
Ma ne wisa ye!?

Bonn/ Almanya

[habasch70@hotmail.com](mailto:habasch70@hotmail.com)